

天一閣藏明代方志選刊

武定州志

嘉靖武定州志

武定州志叙

嘉靖戊申武定州志竣鄉進士劉君崔君持其藁來請  
曰盍梓諸余曰誌也者志也爲可徵也爲可信也爲其  
可傳也三者有缺志雖竣未也勿梓可也曷已諸劉君  
崔君撫然有間復請曰志之弗修久矣敝州闕典也幸  
茲竣編願有以竟之余曰非也吾不樂其成也樂其成  
而未也不憂其梓也憂其梓而敝也姑待諸二君俯而  
退於是持其藁復入局研精殫思摛藻掇華冗者剔之  
利者正之缺者補之再逾月而就編往跡來鑿章程大

武定州志

卷之五

序

一

二

三

四

五

六

備余取而訂閱之詳而覈貞而不忒詳故可徵覈故可  
信貞故可傳以是而觀風考政釐弊問俗猶視諸掌也  
於是二君復申前請益力迺卜日以授梓人謹叙諸簡  
首曰誌也者邑之史也粵自八索九丘亡而禹貢職方  
氏作周官有小史掌邦國之志是古者天下郡邑莫不  
有志凡以隆治也我

明一統有志亦倣古遺意也武定密邇

京畿在古爲棣州稽諸禹貢爲兗州之域歷世以來僉為  
重地宣德中漢庶人憑其地謀不軌

聖駕親平之正德中流寇猖獗橫行東土間迺復建武衛  
監以憲司不可謂不重也顧州志不傳文獻其何所賴  
耶迺不自揆量與一二君子圖成之是故首之以沿革  
方域正其始也次之以川澤城池別其區也次之以公  
署學校端其則也次之以賦役兵防表其制也又次之  
以祠祀職官選舉大其化也終之以屬縣以別聯屬之  
道也其立義也嚴以精其取裁也公以正其考覈也詳  
以慎綜數百里之故實新數百年之未備期可信可徵  
而可傳也後有作者因畧以致詳其爲司官之助豈小



補也哉是志也始其命者兵憲樛菴王公勞其事者鄉  
進士劉君繼先崔君士偉督率而樂成之者學正何宙  
也謹並書之以俟後之作者採焉

嘉靖戊申秋七月庚申吉

賜進士出身奉直大夫武定州知州安福劉佃書

北至陽信界聖

聖界五里

聖界四里

社稷壇



城隍廟




聖廟

聖廟

聖廟

道備矣



聖廟

聖廟

聖廟

聖廟

聖廟

聖廟

聖廟

聖廟

聖廟

聖廟

聖廟

聖廟

聖廟

聖廟

聖廟

聖廟


聖廟

聖廟

聖廟

聖廟

聖廟



聖廟

聖廟

聖廟

聖廟

聖廟

聖界八里



聖廟

聖廟

聖廟

聖廟

聖廟

聖廟

聖廟

聖廟

武定州志目例

建置沿革志第一

方域志第二

川澤志第三

城池志第四

公署志第五

學校志第六

賦役志第七

兵防志第八



祠祀志第九

職官志第十

選舉志第十一

附屬縣志

武定州志上帙

武定州知州安福吾南劉佃校修

儒學學正新昌琴溪何宙考正

鄉貢進士邑人敬虛劉繼先同修

建置沿革志第一

武定自帝魯時為兗州域唐虞夏同南距濟西惟兗州京

今之兗州也今徐州地載稽之古少昊世乃爽鳩氏之墟厥後有

季荊氏逢伯陵氏蒲姑氏寔惟殷商之代蒲姑氏

信縣漢於陽信置博昌縣洎周時蒲姑與四國作亂成王

縣有蒲姑廟蒲一作薄

滅之其地賜太公履東至海西至河南至穆陵北至無棣

時地乃有專名隋唐以來置棣州歷春秋戰國俱為齊地

秦為齊郡地始皇東巡厭氣次舍于此又名其地曰厭次

漢以來置厭入漢為平原千乘渤海三郡地前志曰時武

其西境為富平樂陵初等縣地屬平原郡東南境為千乘

博昌涇沃等縣地屬千乘郡北境為陽信重合千童等縣

今屬渤海郡或訊三郡所在曰平原即東漢和帝改千乘

郡為樂安國唐章懷太子後漢書注云千乘故城在今淄

時又為樂安國平原渤海郡地逮曹魏建安中始置為樂

陵郡武定有治領縣三曰樂陵郡曰陽信曰厭次晉為樂

陵國武帝改為國領縣五曰厭次曰陽信曰新樂曰樂陵曰溼

沃晉末地歸北魏仍稱樂陵郡屬青州部領縣如晉熙平

二年分瀛冀二州為滄州又改郡屬滄州領縣四省新齊

周俱為樂陵郡按史劉宋蕭齊俱書樂陵郡事此何以不

並僑置郡縣以司牧之皆在南中特假隋廢樂陵郡徙渤

北名耳非復曹魏所置之樂陵郡矣自此始為州大

海郡治陽信開皇六年又廢渤海郡置棣州武定為州大

業二年改棣州為滄州三年復廢州置渤海郡領縣十曰

陽信帶郡曰樂陵曰溼沃曰厭次曰蒲臺曰饒安曰無棣曰

鹽山曰南皮曰清池按此渤海代樂陵也滄州易棣州也



也皆武定治唐興改郡為州武德四年分置棣州治樂陵之別宗也

唐蓋鑿隋廢樂陵郡所轄失之偏徙渤海郡所領失之繁故仍各復其舊然此時改郡為州北為澹州治饒安南為

棣州治樂陵自是惟以棣州八年棣州廢貞觀中分天下稱而不復以樂陵郡稱矣

為十道復置棣州于厭次縣始有定置隸河南道領厭次

帶商河陽信蒲臺並置渤海為屬時渤海郡廢特置縣以存名耳今省入濱州

天寶初改棣州為樂安郡按唐樂安郡即棣州也宋金亦稱棣州為上樂安郡舊志因此

并漢樂安郡亦收誤矣乾元初復為棣州自是分授于方鎮以迄于

唐亡其先開元二十年幽州節度領棣州至上元二年棣州隸淄青節度建中三年幽州節度復領棣州貞元

元年成德軍節度增領棣州元和四年棣州隸保信軍節度五年成德軍節度復領棣州十三年棣州隸橫海軍節



度太和二年淄青平盧節度增領棣州咸通五年太五代  
平節度增領棣州十三年淄青平盧節度復領棣州五代  
梁華溫琪爲棣州刺史徙新州以避河患民賴之周顯德

三年割棣州之蒲臺渤海二縣置濱州自是棣州領縣三  
屬次商河陽信宋祖分天下爲路棣州隸河北東路上樂  
安郡置防禦建隆二年升爲團練俄爲防禦領縣如周大  
中祥符八年春正月戊戌詔徙棣州陽信界先時河決棣  
州知天雄軍寇準請徙州至是河北都轉使李士衡又奏  
徙州遂徙州西北七十里旣而大水沒故城今人稱文餘

華溫琪徙新州蓋自隋棣州徙于古城此又自古崇寧元  
城徙于今州何知之以古城至今州七十里也

年始詔工部尚書牛保葺城事葺一州城何以工部尚書行蓋棣州在宋為邊鎮重

也之故建炎三年没于金金初畀劉豫國號齊凡八年偽齊

亡金始據其地分屬山東東路因宋上防禦樂安郡領縣

如宋後為元將木華黎所陷地屬元元初濱棣自為一道

中統三年改置濱棣路安撫司至元二年仍分棣州隸濟

南路領縣如故至正二十八年正月大明兵取棣州洪

武元年省厭次入棣州元以前州置附郭割滄州之樂陵

無棣來屬陽信商河如故六年以棣字犯諱改棣州為樂

安州宣德元年平漢庶人仍改為武定州言以武平定其

州也夫郡邑之有建置沿革猶人族之有譜牒也武定祖曹魏之樂陵郡宗隋之棣州舊志祇知宗棣州而不  
知祖樂陵郡見唐有樂安郡也反于漢之樂安暨千乘事  
物俱撰收入豈不類郭崇緇之拜子儀墓耶既失已祖為  
不仁又妄認它人之祖為非孝遂今二千年間閱圖志者  
茫茫不見原委亦誠可悲夫肆今覓其真系而正之以  
後之博雅君子也

論曰地一而已矣其稱名畫域在右則歷世相因于  
後則感時屢變何哉古人公天下而無事後世紛紛  
故也公而無事故政簡而多因紛紛故政繁而多革  
是以爲國爲郡爲路爲州凡幾更變循名者莫得其  
原之稽責實者弗知其繇之來憤替而厯雜咸以此



也 皇朝鑒古析壤定制名號殊而統屬正萬年不易之規也後賢寧無鑒于茲乎

方域志第二

武定天文危宿之分野也大抵平夷闊衍廣九十里袤九十三里東抵濱州九十里東南抵蒲臺百二十里南抵齊東九十里西南抵商河九十里西抵德平百二十里西北抵樂陵九十里北抵陽信四十里東北抵霑化七十里西南距濟南府二百五十里西北達京師七百里西南達南京一千一百里其舖十有五州前曰總舖趙皮莊舖張家

莊舖雷高莊舖神保堂舖聶索舖史官莊舖王判鎮舖大

李莊舖俱州南永利鎮舖蘇家莊舖州東白佛堂舖梁家

莊舖鄭家務舖州西劉家莊舖州北其鄉七編里原一百

一十四今省爲九十八附郭曰在坊十五里郭外曰親仁

鄉十一里東明義鄉十五里西明義鄉十二里崇智鄉十

三里守信鄉二十里其集十南人曰上市北人曰趕集北關逢一瞻聽

樓南逢二南關逢三州衙後新街逢四東關逢五北門街

逢六喬子頭南逢七舊志云初州徙于喬氏莊居民千家樹木稠密土地突起故今俗猶呼城

中十字街曰大喬子頭西門街逢八州衙東逢九東門街

南十字街曰小喬子頭



逢十其鎮十有六州東五十里曰永利鎮

即桑落聖相傳  
始皇東巡駐蹕

于此桑偶  
落枝因名

東南三十里曰麻店四十里曰陷棣州鎮

其鎮乃舊

時州之西  
關地稍高

六十里曰成官莊曰李家莊七十里曰歸仁鎮

舊設巡檢  
司今廢

八十里曰小新城九十里曰清河鎮

設巡檢司南三

十里曰永興鎮即第五十里曰聶索

即宋史聶  
婦也今訛

七十里曰

王判鎮舊名鳳

八十八里曰齊東北馬頭鎮西南三十里

曰棘成鎮

疑此為陳後山  
集鷄籠鎮之訛

四十里曰淄角鎮

金史作脂角  
今訛為淄角

或遂以為淄水之角獨不  
思此地何以有淄水也

三十里曰西新店西二十里曰

青陽店

夫方域者治之據也得其據而治可敷是故古有  
職方氏以辨都鄙形方氏以正封疆亟亟而不容

以緩者正  
此也

論曰惟濟南所轄之州四論殷阜咸出武定之上度  
地里則武定獨稱闊焉蓋武定平原四周百里相望  
不可不謂幅員之雄然稽其鋪鄉市鎮率多空虛寔  
乃荒落之陬未經厥地者按圖而顧之曰武定闊也  
加之煩科焉是徒闊而不殷阜闊乃爲累也譬之人  
身支體碩大容貌修然然其榮衛中虛碩大何恃所  
謂外強中乾也苟徒跨其壤之闊不思處其中之虛  
則百里之內豈不爲有司之憂矣乎

川澤志第三

黃河距州城南五十里今稱土河舊志謂即徒駭河故道  
從東昌減水閘來至禹城西南李家莊之將軍廟北流東  
經臨邑南田家口濟陽北高橋過州聶索鎮經古城西北  
陷棣州南再經濱州西霑化東入海又聶索鎮東西河腹  
高于岸每淫雨河北仍不免于潦成化十年判官璈奉都  
御史牟公檄䟽鑿自是水患少息民賴之今又逾一甲子  
淤塞如舊

宋河渠志曰黃河自昔爲中國患禹迹既湮河并爲一



特以隄防爲之限自周顯德初治隄邊之太祖乾德二  
年遣使按行將治古隄以力役大遂止但詔民治遙隄  
以禦衝注之患五年詔棣州長吏兼本州河隄使尋又

置河隄判官一員淳化七年始詔罷葺遙隄自漢以來

人患惟宋治河為甚詳其所謂遙隄者又曰舊制歲虞  
今人乃誤稱秦隄或又稱絲隄尤迂

河決嘗預調塞治之物凡伐蘆荻謂之芟伐山木榆柳

枝葉謂之梢擇寬平之所爲埽場埽之制密布芟索鋪

梢梢芟相重壓之以土雜以碎石以巨竹索橫貫其中

謂之心索卷而束之復以大芟索繫其兩端別以竹索

自內旁出其高至數丈其長倍之凡用丁夫數百移置

于卑薄之處謂之埽岸凡緣河諸州皆有埽棣州有聶

家按隄鋸牙陽城四埽今求其埽處俱不得獨所謂聶

為聶索或曰聶索是二家姓  
殆未識此而曲為之說也

濟距州城南八十里而遙今名大清河其水自張秋分流

北經長清齊河至歷城而東經濟陽齊東入州境又東過

青城北濱州南蒲臺北利津東入海

沙河距州城南十里輿地記指為馬頰河云按馬頰河在

商河北三十里故道從臨邑西南來東北經商河北過沙



河鎮至州南東去由桑落墅過陽信界東北至霑沾化盆河  
會土河入海今積沙無水雨甚則桑落墅西南皆窪潦今  
陽信城北二十五里蓋有頰河店云

鈞盤河距州城北二十里陽信境內故道從陵縣東南臨  
邑西南來分而二其一由德平商河之間北行東北至陽  
信城南二十里而斷有截河舖又東復續經霑沾化東南劉  
家道口亦會土河入海其一由德平西北行經樂陵海豐  
南過霑沾化北而東至久山鎮入海今陵縣東臨邑西有盤  
河店云

覆黼河距州城北八十五里海豐境內故道從陵縣西南  
來北行東過樂陵南海豐北二十五里過馬谷山南潤國  
場東北入海或疑此爲鈎盤一支云

鬲津河距州城西北百二十里樂陵境內故道從平原縣  
西來北行東由德州兵橋寧津南皮境至樂陵北三十里  
舊縣鎮南又東過慶雲南經海豐馬谷駱山之間東北至

海潤場大沽河口入海樂陵北十里有鬲津鄉前志曰按

爲說人殊揣碣石爲證謂皆淪入海者程氏暨縣道元水  
經也謂或新河載以舊名或一地立爲兩說皆似是而非  
蔡九峯書注也夫禹時九河信不可得而知即今武定遠  
邇求之其故道猶有可攷如此乃謂九河皆淪入海恐未

可為駁論獨九峯謂新河載借各一地  
兩號者則客有之然亦無可于稽矣

大灣距州城西南四十五里廣十餘頃北有隄橫亘水深

不測甚旱不涸民嘗禱雨於此其水西南通臨邑八道河

西通商河河東通聶索河舊志曰成化間章丘山北突出

而一出也夫濟水至章丘九十里而進至大灣四十

里而近用是以觀大灣亦濟水伏流而一出也明矣  
白龍灣距古城東南一里大清河北岸有高隄橫亘一里

許蓋舊築以防清河決者

惠民溝距州城東南二十里溝南望徒駭河河溢北流于

果窪豬焉景泰中果窪水遙侵州城乃謀開溝東北三里



道壘窪于沙河民賴之因氏曰惠民溝

八方泊距州城北五里凡雨潦得西南之水遙自商河迤

南赴沙河鎮過李家莊經青陽店管家坊來注又東南得

州城濠之水濠水乃城之東西南三方雨潦所歸者北濠

惟下歸水又皆會焉溢出自關北三官廟前流于泊泊北

有水道達于截河過霑化北青泥溝入海按城濠水溢流于泊此祥符間

徙城之水道也今城濠水因三官廟前近起土堰不得即

流于泊泊水障于隄又不得達于截河嘉靖十三年甚南

水入州城北門十八年又大水深入北門城幾危幸雨息  
而免夫天雨無量設不息奈之何詩云徹彼桑土思患預  
防之功在今日誠  
不可不蚤計也

窪十四有仝家窪齊皮窪河柳樹窪寧家窪康家窪頭舖  
窪孔家窪趙家窪楊里窪朱家窪廟王窪蕭家窪齊家窪  
蒲窪外又楊家灣蓮花池者胥秋霖注潦處茲亦舉大較  
耳前志曰地本庠兼之近世河道夷塞故多窪每遇恒  
雨即諸窪經年積潦至乘舟而漁民往往流徙凡以水  
利不講滯洩  
無制故耳

論曰夫水一也善理者爲利不善理者害焉其在武  
定無河海之災有旱澇之患秋水時至匪爲巨浸時  
或恒暘又桔槔無術不得藉爲灌潤是以窪泊實魚  
鱉之區原阜惟枯槁之市其何以衣食億萬口耶往



年惠民溝曾用疏導至今爲一方利若瀕河者逼窪者咸襲其謀必有永利興乎其間庸詎知夫無有敷惠政者加意於茲今也哉

### 城池志第四

舊城歷有徙置今城初惟陽信之喬氏在宋大中祥符八年徙崇寧元年始詔工部尚書牛保勳治甃表周十二里崇三仞有三尺上闊丈餘基倍之東南西北門四各三重中門不正出惟委外門額各有石鏡青肅明遠金景靖安字內門有樓扁曰春風明遠景山紫薇復浚濠潴水有飛

橋有護城隄九年克績

按金史明昌五年都水監丞田棟因河決議水所經城邑作護城隄

正謂隄州等處舊志乃以隄為牛尚書作何也今姑因之

金大定十九年奉詔修厭次令仲山記記曰隄州在秦為

厭次歷漢屬平原至隋置州舊城在今城東南四十五里

隋州在舊陽信縣今東南舊城乃唐貞至梁華溫琪為刺觀復置隄州于厭次縣處也仲山失攷

史苦水患徙新州今南舊州是也今州郡處奉詔旨揆日

鳩工委縣司長分董其事取戶之上中且佐以軍隄刑徒

乃命幕府提振之以二十三年九月朔經始次年二月末

功畢前後一十二萬四千三百四十九工其人作勞之初

僉曰國家愛民未嘗一日任力于天下今城之功計甚小  
而費寔大若不人倍其力以從役且何以如期襄此大事  
哉况郭郭以興崇門以立我等所居必獲安妥此雖暫勞  
可以永逸故興役之日雲屯霧合鼓舞謠歌不知其勞疲  
至有持羊載酒樂犒其勤者不勸而自至負畚荷鍤願助  
其役者不召而自来遂致崇墉屹就四門一新周回二萬  
一千六百尺爲地一十有二里不逾元期俄告就緒丕休  
哉

明成化五年知州述弘治十四年知州永禎與千戶所分



修之州東西北三方所惟南正德六年兵備僉事逵又大  
修治之加舊十之五自爲記記曰太古民俗簡朴草衣土  
室搏生咀華出作入息智巧不施惟欲寡則無爭惟無爭  
則不待守而安矣及古往民欲滋長宅廬之外畫棟飛翬  
布帛之外雕文刻縷菽粟之外山萌海鮮室家之外淫聲  
豔態游觀之外劇藝翫好凡罔利干名誇多競麗類如此  
欲多則奸出奸出則爭起爭起非守莫能一日安先王制  
爲城郭以爲民守此亦理勢之必然者按武定志乃齊之  
無棣歷漢唐沿革不一 皇明國初仍爲樂安州宣德始



更其名城厚而闢地亦廣大可以爲守惟歷歲月風雨流  
潦城之四圍荐頽削池亦淤塞有蹊徑通行人四門東西  
北三樓徒植土壁瓦矗如脫鱗簷廊如折骨空隙之處惟  
包茅閉之南門無樓存一長鋪敝陋尤甚城上數小鋪草  
覆土壘門內直房隙地皆侵爲民居污穢沓踏官軍莫可  
守宿門外各二重城廢爲土隄守者恐爲賊階梯遂毀之  
不慮因而修之爲險毀之功倍于修而又失其險也正德  
壬申春賊執孔熾攻城屠邑俘生戮死民命靡爛極矣余  
爲樂陵令有御賊功蒙欽陞今職奉勅整理武定等處

兵備登望至此俯仰惶懼方議板築之事當時民罹賊禍驅逐未遑及地方甫寧亡者未入立隴存者殘傷未復亦未可役也癸酉秋大有民生遂利乃檄州所官屬會議其事僉曰世功也不可緩復謀之於衆罔不同往日工作軍四分之一民居其三軍少於民力或不堪科支不無私議又檄各官軍民戶丁夫役相準上中者置物料科下者出力役修築尺度有差責殷實人督催之秋毫不使之預人皆曰勞我者佚我也夫何敢辭欣欣然趨事如家不數月厥功成矣大率所建門樓有四重城併門有八腰角樓十一

小舖百直房併馬道八炮樓一十六甕覆城面闊丈餘築  
口千餘池深數尺四旁環柳植萬餘飛橋四關門八規度  
視昔若改觀矣夫古來山東號用武之地州居省北東通  
青登萊三府西會燕幽北抵海濱曠夷無谿壑之阻往者  
盜起每經其地尤爲要害今民生恬熙若無患可防矣然  
功久未有不墮無患不可忘備功始于微用力少而易成  
患不爲虞功至于大用力多而難成患卒莫能禦每歲春  
秋農隙之時又使民修治亦爲此懼也嗣是以往爲官守  
者有民社爲士庶者有子孫將志患而用力于火乎防患



而用力于微乎深思熟計不可使有噬臍之悔也方成厥  
功士民樂于紀事以昭不忘余憂其溢美已之功姑述此  
以俟來者

嘉靖十四年秋僉事璣繼前僉事賜議又重修之更樓額

四扁東曰眺海南曰仰岱西曰思河北曰拱京

璣之說曰拱京志

君也思河志民隱也仰岱眺海志學也

有國子祭酒呂柟碑曰武定古齊無

棣地即周賜太公履北至無棣者也國初因元仍稱棣

州尋改樂安州宣德初以平漢庶人之亂改武定然猶未

有兵備之設也乃流賊颯起于正德中猖獗山東蹂躪南



北直隸于時許忠節公汝登以樂陵令禦賊有功陞山東  
按察僉憲兵備于斯遂爲建鎮之始而武定北拱京畿東  
南衛齊魯西南控趙魏徐兗諸地無以襟濟汶而帶運河  
遂爲重鎮矣第其城池屢經修葺未克鞏固先僉憲覃懷  
王君明叔雖嘗請議未果遷去至是僉憲三衢王君在叔  
繼爲兵備莅政之日圖厥先務莫急于此且曰往者霸上  
盜起北趨青淮而南必由此于時附近郡邑濱暨陽信海  
豐樂陵霑化德平商河齊東青城諸州縣人士咸奔赴鎮  
城避寇夫今聖明在上天下太平萬無往事然或水旱

相仍饑寒嘯聚則此地其可旦夕帖席者哉遂奮然集議  
申請撫按偕允而行爾乃程役動衆計費課工軍民咸樂  
趨事未暮而成是役也王君發金易灰于章丘鄒平易薪  
于海豐霑化陽信商河建造甕甌窰二十于東城之厓金  
用本道紙贖等物完計三十九鎰役用所屬團操民兵更  
番赴工董役之官用其嚴選廉幹屬吏城四門皆有層樓  
腰角樓之臺十有一敵臺百有九崇七百有五十仞表二  
千有五百尋池隍皆深濬殆及泉於是四方至者瞻望崑  
峩屹不可犯內可以教養斯民禮樂諸士外可以潛銷奸

完之萌矣昔豈渠丘公不修城池敵且惡陋至使楚人浹  
屨克其三都君子甚非焉夫武定京師之藩蔽山東之咽  
喉城之良是也且王君嘗著大人說矣蓋以天地萬物爲  
一體而復赤子之初心者也當其志固欲爲天子城九  
州而來四邑豈特一武定哉碑今豎在城北樓左璣又兼  
葺四關門南關門復甃以甃植綽楔扁曰古齊北鎮云後  
聖人守國之道必城郭溝池以爲固故周官有掌固之設  
雖然此特固其外必有所以固其內者夫固其內而後外  
固固矣此義可弗講哉

論曰大同之世外戶不閉險非所事也迨世下衰亂



奪日起設險以爲固勢不容已。是故朔方城而虜禦  
莒無備而齊驅勢也。武定城池剗自祥符而益固於  
今日。雄標中區屹若長雲。帶甲數千。咸茲焉。藝往年  
寇擾遠近。投者數萬。固知金湯之險。救又之永席也。  
然自今視之內。多空曠氣。若不實。此兵家所忌也。若  
之何。而可以內實。外固。雖漁陽鞞鼓二十四縣。望風  
皆靡。豈無城池之足恃哉。忠義不立。民心不固。遂至  
此也。故善爲國者。豈專於有形之保障。

公署志第五



州治在城中之北宋大中祥符時立明永樂中冊封漢

王高煦于樂安州遂併為藩府乃移州治于廢三皇廟廟在

西門宣德初王府除仍復中為堂五楹扁持廉秉公堂內

左右有庫外左為吏目廳右為鑾駕庫東西翼為廊房每

典吏一人東曰吏曰戶曰糧科曰禮曰架閣庫典吏一人曰舖

長司吏一人西曰馬科司典吏一人曰兵北科曰兵南科曰刑曰工

曰承發司司典吏一人露臺豎戒石有亭前為儀門外為正門

門內左為土地祠右為狎獄州獄歲久頽圯嘉靖二十七年

慮其踈虞也捐堂之後為知州衙左為同知衙右為判官

衙二吏目衙在土地祠北吏舍在判官衙南申明亭旌善亭俱在州治前西偏對亭有總舖惟南有瞻聽樓僉事瑋重立上有木牌各書二十四令樓下爲鞞窠有小木牌十二書時陰陽生司易置欲民瞻以作事聽者又欲夫聽鐘鼓以窺興也瑋有瞻聽樓記記曰夫自王都以達于天下凡省若郡及縣皆設有鐘鼓樓所以爲民也民雖愚而耳目具焉耳目之司而瞻聽存焉使瞻聽有具則動靜以時民事用章而王政可舉矣武定舊有鐘鼓樓名譙樓歲久且壞嘉靖丁酉予來飭武備欲理之未果越明年春乃商



確於州守唐子倬撤而新之遂易其名爲瞻聽於乎建樓

所以爲民也若夫更鼓分明勸課以時又在乎爲守者戊

仲冬朔瞻聽樓落成琇載賦詩五首○縹緲飛樓建登臨

亦壯哉新成翻燕雀舊廢捲蒿萊日月憲中度風雲檻外

末舉頭聊極目直北接三台○危樓星可摘百尺已稱雄

西望裏海色東臨中薊北燕山迴微茫一路通○樓傳自

漢廢往事亦堪傷歲月失朝駭干戈有戰場親征勞萬乘

薄伐統諸王不忍憑欄望悠然感慨長○築樓自暑月寒

日乃言成瓦棟挿天立笙歌接紫生仙舟雲謁謁海市氣

盈盈何處尼山是徘徊繞檻行○樓成今始上身若在層

霄四面風煙合中天日月標瞻依北斗迤邐紫宸遙綏

步重欄處寒雲亂眼飄

兵備道在州治西舊爲布政分司正德七年僉事達始改

正堂三楹扁曰憲臺僉事璣更儆戒無虞有記記曰歲癸  
巳冬孟璣飭兵武定諸路旣蒞任惟瘝厥職是慄慄迺命  
其視事所曰儆戒無虞客或過而議政曰予姑以志學云  
爾夫學心而已夫心至神而微運之乎無聲無臭而千魔  
萬蠹伺焉斯須弗戒夫皆得而乘之故學凡以爲心備焉  
已矣古之政學也一後世也二古之政學也心後世也迹  
心故一迹故二一故即學而政藏矣即政而學顯矣予惕  
夫政焉而忘學也故一志之後有見賓軒有退堂有寢堂  
有樓有道心書館中有僉事璣大人說說曰大人其人之



初乎何者人天地之心也故無弗大其小焉者非初也大  
人之能大也非有加也完其初焉已矣夫孩提之童無弗  
知愛其親及其長也無弗知敬其兄是謂赤子之心渾乎  
若無知而爲真知茫乎若無能而爲真能者人之初孰非  
是心也而完焉者寡是以不失赤子之心獨歸大人或曰  
大人惟心是心惟赤子夫人同也而奚其獨大也夫心神  
明而變化無方體限量者也形軀限焉於是有時乎不能  
神明而變化也是故學之爲貴夫學所以立其大也慎獨  
而大人之事備矣堂之前兩翼爲隸室中爲儀門外爲正

門門內左有土地祠道之東舊有陰陽學今更爲官廳後有萬全鋪僉事燁嘗新之令團操馬快居之省其賃民屋之費

察院行臺舊爲按察分司洪武三年同知昱立景泰元年知州肅重修署州學事海豐訓導李杲記記曰武定古青齊地今山東望郡司在州治東北寔舊厭次縣治也歲久頽壞太守沈公撤舊拓故其室宇遂各高廣壯麗大小凡四十楹經始于六月落成于十月云正德間始更爲察院前有綽楔曰激揚然亦時或借爲按察司嘉靖丙申有副

使張鳴者管書雀啄啄其辭曰城雀何啄啄朝飼白頭禽  
夕抱黃口穀採花深礪裏水深不可握捕蟲綠樹顛枝高  
不可捉往來林藪中盡日靡粒渥手口已瘡敵毛羽盡摧  
剥徘徊翔故丘棲息止地堦路逢游冶郎較藝鬪卓犖駢  
馬黃金羈琯弓白玉稍挾彈射層霄張網羅嵩嶽雀也適  
罹此微命幾所拯求食傷艱難履禍悼竒倬母腹固忍饑  
子心亦如濯傍人常戚促仰天徒謠詠骨肉恩誠深輕生  
良未覺今石藁屹存但無所問寓意也

布政分司在州治東南



府館在州治北

儒學設司吏一人在州治東南南事在學校志中

預備倉在州治東南舊別有官倉今廢為馬市其官吏設

典一移附于此倉以積貯給貧餒耳嚮給時其粟率為姦

人坐待旬時往往得不償費攜餘以歸給家餒者寧幾人哉

於乎姦索乃盈枵腹則虛凡此典守者惡可弗念而懲艾

陰陽學設典術一人醫學設典科一人在州治東南儒學西今借為

社學

僧正司設僧正一人在州治東南三學寺成化間有僧無住者

夜以銅錢三百散布室中揣取之比曉收不失一久而心  
高遂靈能前知休咎聞雲林僧有道行往參之其悟諸詩  
也有日正峯巒山沒影月穿江海水無痕之句後翔  
章丘石橋于湍水上人利賴之至今頌德石在焉

道正司

設道正一人

寓於老君堂在州治東南

堂一名紫陽宮

養濟院在州治西南弘治十四年知州永禎立嘉靖十一

年知州侃豎亭一扁曰四先

取先斯四者之義

巡檢司在州城東南七十里清河鎮洪武三年同知昱立

設司吏一人

武定守禦千戶所在州治南漫西中有正廳退廳鎮撫廳

吏目廳百戶廳倉庫局獄儀門正門

夫公署政化所繇出不可侈亦不可陋後

者惟譽之夸而避嫌者又好矯于陋以自旌是二人皆過也噫非有德之君子其孰能制宜之也

論曰設官分職各有攸居究其義則安在辨等威閑內外出政教萃觀望是已等威辨則制度不可卑內萃則遺大投艱之區察此四者而後知庭宇之制不可侈亦不可陋侈則惟譽之夸陋則避嫌而且矯以自異是二者皆過也噫非有德之君子其孰能制宜之而稱其義乎

# 學校志第六



學在州治東南南宋崇寧元年立有碑其文剝蝕不可辨金  
天眷中燬于兵有知州蕭恭者重立實文通爲記今求其  
文不見明昌五年知州安民玠相繼修之翰林學士党懷  
英記記曰棣州治東南爲宣聖廟即殿之後爲橫舍積歲  
歌傾客有梁彥珪者來自黃龍樂州之風土而家焉其子  
棟肄業學館有塲屋聲一日謂棟曰異時吾繕爾當三十  
萬爲助明昌三年郭公安民由禮部侍郎出守是州慨然  
有修舊起廢之意方復經度會有移鎮之命明年石公玠  
寔始繼來思舉前作獨念給用不足棟因告其遺命復有

郡人崇昌聞風欣然願同棟數既又厭次進士李備亦以帛幣爲助副以梁椽衆材直百千石公聞之喜曰可矣經始于五年春三月而工畢于是年季秋落成之日士庶耆老咸歎相賀以謂壯麗嚴敞視舊有加焉

元至治三年州尹顯再修太子詹事丞張養浩記記曰至治三年春二月戶部郎中晁顯拜棣州尹始奠謁先聖先師喟然嘆曰聖人之道物無與大今廟制卑褊不度且歲久寔敝弗治將壓夫學宮政教攸本今若是民何仰焉乃命州士王敬道相其役肇于其年冬十有二月迄于泰定

明年三月視昔搆恢然矣伏惟夫子之道莫隆于今魁人  
碩士褻然以出其傳聖人道者乃惟覃懷許衡氏寔焉一  
人何耶蓋嘗攷夫許氏之學其所拳拳者小學四書未嘗  
以博洽稱焉未嘗以能文辭稱焉未嘗以多材藝稱焉其  
所守至簡其用力至省其究乃傑然迥出一時之表而從  
祀于聖人夫彼所以劇且勞不克脫凡近者從事于技也  
此所以簡且省顧日躋于高明者從事于心也心焉者言  
行慥慥不弛于冥不矯于顯窮達禍福一無所撓技焉者  
則忘已而役于物外觀若媿中寔無所持故儒有君子有



小人學有爲己爲人之不同者此也於乎凡學于是者自  
今其踐行爲務而本之以經術庶幾臣焉殫厥忠子焉殫  
厥孝母婢覃懷許衡氏獨焯乎前是則賢太守今茲興學  
之心已

明洪武三年同知昱天順四年判官祥再修翰林學士劉  
定之記記曰武定州屬山東濟南郡其儒學洪武初二守  
夏君昱嘗新之歷年將百風頽雨剝天順間判官賀君祥  
始與其同官謀及乎是乃相與捐助郡太守陳君文衡聞  
之亦輦粟六百斛來餽于是賀君得以盡其欲爲之志殿

廡櫺星戟門既完好矣而講堂齋舍庖庫之室與夫祭薦之器亦莫不以次告備夫學校者器也居于學校而仰慕聖賢宗廣德業者道也器已具而道則墮者吾尚見之矣不居其器而務其道如顏淵之在陋巷而能復聖原憲之處環堵而克速肖曠世希見豈易得哉此任教人育材之責者所以不可緩怠于學校之修然後君上能享得賢之効也

學舊不脫鄙聊入嘉靖始備規制繇今稽之有先師廟五楹東西廡各七楹南爲戟門爲櫺星門門外有泮池池南

有屏蔽遠有泮宮坊神厨神庫各五楹在戟門外宰牲房

三楹在神庫後啓聖祠三楹在先師廟東敬一亭三楹又

東忠節祠自爲制一楔門入又亭之東名宦祠鄉賢祠各

三楹在戟門之西明倫堂五楹在先師廟之北又後堂三

楹其東爲學正衙其後有尊經閣嘉靖十五年秋僉事璣初聚多書其中又自爲

記以誨學之師生俾求經于心于人倫日用而惟堂之前

左右三齋九楹舊爲日新時習進德學正宙更爲志道齋

後有諸生肄舍各十五楹肄舍東爲射齋之南爲兩門西

曰振鐸通于三訓導衙東曰賢關外出達儒學正門先時宣德



間知州民立育賢樓今不見其址嘉靖十年巡按公熊榮  
蒞見學宮後庠下命巨土補之長四丈闊半之僉事賜題  
為御史隄復環隄植葦密比森盛人口東谷葦十三年狀  
元楊惟聰時為山東叅政至又填助贖土二萬車好事者  
謂狀夫建設本于歷代之相沿修葺殷于諸賢之續作自  
元土  
丁酉之季又漸敝損歲丙午僉事燁視學慨其無足以示  
作人之化也乃檄州疏于巡撫何公巡按党公咸聽其議  
遂捐本道贖金二百餘兩州董其役經始于其年秋九月  
落成于明年夏五月於是廢者立汚者新視舊大為整肅  
燁又立社塾四其二借陰陽醫學洎州前總舖為之西南  
隅新興街一東北偶舊土地廟處一則初起者古學校之  
政有小學

有大學小學是向內涵養道理其工夫極為緊密大學漸  
拓向外而規模却甚大也今人無小學工夫惡能拓之盡  
得大學規模是義也余  
嘗聞之樗菴先生云

論曰學校人才所由出也人才有盛衰則天下國家  
有理亂成周之世師氏以三德教保氏以六儀教司  
徒以三物教故當時之士邁乃訓而弗暇又奚爵祿  
之憂其得人成治之效彰彰如也今學校之設亦成  
周之意然歷世師儒弗古訓是式月書季考徒事虛  
文而已德行道藝之稽則蔑如也故識者謂為今之  
計必重師儒之選慎簡博學有道者為之其教之之

法雖未必如成周之盛亦須本末俱舉文行交修而  
不徒月書季考之爲務爲士者亦必奮然以實學自  
力而不假辭章以媒功利啖世味以壞心術如此則  
養士之道備而真士出治化由之可基矣武定亦古  
名邦也多士毋循其習溺其心以壞於爲士之初庶  
幾乎他日之淵儒碩卿哉

賦役志第七

一曰土田官民地九千六百八十二頃五十三畝有畸官  
民綿花地三十頃四十九畝有畸宣德元年賜內官劉寧  
地三頃六十八畝未



牧二曰稅糧夏稅實徵小麥一萬六千三百二石三斗九  
升有畸秋糧實徵三萬八千三十八石九斗一升有畸地  
畝絲四百三斤一十兩有畸絲綿折絹二百一十二疋二  
丈三尺有畸農桑折絹一千四十三疋八尺有畸綿花絨  
八百七十八斤六兩有畸馬草七萬六千九百四十五束  
此外又有驛傳息縣太平驛上馬三匹中馬三匹下馬二  
匹汶上縣新橋驛中馬二匹臨清清源水驛下馬一匹武  
城縣甲馬營水驛站舩水夫十人遞運所紅舩水夫一百  
一十六人德州遞運所紅舩水夫二十人梁家莊水驛站

船水夫五人

州人皆正一副又有貼戶輪科舊時

便三日民數軍民校尉將軍尉竈醫匠一萬七千三百七

十二戶寄莊戶二百三十六男婦老幼一十二萬七千一

百九十七口

宣德元年賜內官劉寧家人六戶蔣理薛充魏全吳友誠劉幹石崙永不收籍四曰

差役食鹽口鈔七萬三百有畸此外又有均徭銀力二差

歲科無停其銀差則有春秋祭品九十四兩一錢鄉飲酒

禮十二兩德府慶賀禮八兩藥材六兩齋郎二十兩校尉

五十兩京班柴薪三百二十四兩京班直堂皂隸四十兩

殭蠶價四兩易州廠柴夫一千四百五十五兩八錢木柴九

十兩五錢二分五釐按察司馬夫四十兩門子十兩布政

司皂隸十二兩庫子八兩曆日緙價十六兩濟南府庫子

四兩司府柴薪七十二兩德府斗級六十兩協濟牌夫二

百七十兩鹽運司脚夫四十六兩兵備道皂隸一百四十

八兩門子三十兩按兵備道緣十八州縣而設其門隸何獨取之武定也君子無偏枯之政嘉靖

二十五年冬知州佃具本州柴薪一百六十八兩馬夫二

百兩儒學齋夫九十六兩膳夫六十兩歲貢禮三十六兩

民壯二千五百二十五兩二錢舊四千一百四兩倉事燁減快手七百

二十兩料價八百七兩二錢聽差三百五十五兩計銀七千



七百七十七兩六錢有畸其力差則有先師廟門子一人

察院行臺門子二人布政分司門子一人府館門子一人

本州門子六人皂隸三十人庫子二人禁子八人鼓夫二

人舊用五人知州侃者為二人夫以二人鍾夫一人巡攔

四人驛司一人按州舊有林崇館驛因設驛司自漢唐人冊封于州已併驛為藩府後不聞再設何

故今猶存驛司之名而歲費雇銀四兩也况執掌不過甫書公文往來耳舖司足以兼之矣此當省而不省者舍

司十五人舖兵三十五人官倉斗級六人儒學門子六人

埽殿夫一人斗級一人庫子一人巡檢司弓兵二十人計

銀二百三十八兩有畸它諸浮費不與焉此外又有大戶

於人戶中僉派殷實者收受花戶錢糧仍管交解近里甲  
年花戶逋者多責大戶培補州民徃徃因此蕩折里甲  
每里十甲甲十一戶一為里長餘為甲首老人每里僉老  
十年輪役一次凡百供應科費取辦焉老人一視民  
訟斷又有木鐸老人十集頭老人一外鎮集頭老人九預  
備倉老人二兵備道貫辦老人二此外又每里僉書手一  
人會計此外又有孳牧馬一千三十匹兒馬二百六匹騾馬  
八百二十四匹凡兒馬一匹騾馬四匹為一群立群頭一  
人十群立群長一人州共立二十一群天順以前俱五丁  
朋養一匹成化十二年都御史牟公議行每匹兒馬三十  
丁騾馬五十丁弘治七年奉例每匹兒馬十丁騾馬十五  
丁朋養為定制計歲科駒俵以備用近因駒皆矮小不堪

每歲坐派備用馬論丁出銀買馬春秋共俵二百六匹費

銀六千一百八十兩按山東惟西三郡牧不及于東論者

者以它辭得免西部歲時解俵必買于東東人坐食其利

而獨遺害于西此則未解雖然此通六郡而論也今且以

西郡大州論之惟德與臨清稱最臨清種馬止三百匹德

二百四十四武定視二州為何如乃一千三十四此又有

可解者乎夫西郡山東之偏害也武定又

西郡之偏害也書之以埃敷惠政者鑒之

論曰稽古取民之制曰什一用民之力曰以歲上下  
所謂良法美意也自稅畝作備擊鼓召怨民始不堪  
矣我  
朝賦役之法三歲一審編固無不善者但法久弊生吾



州尤甚蓋自漢府除後田制不明姦吏黠胥暗飛詭  
寄產絕糧存者質無所白野多蒿萊者良疇未懇一  
人數役力不暇給是以生意蹙而民用減且州土地  
較諸他郡雖饒然磽者太半徒以其饒不察其磽而  
重之賦此民之困所以甚於他郡也徭役之出銀差  
獨派上戶而辦之無難力差雖利貧民然多徭倩費  
反數倍此又所以致困也然則柰何必也其均田乎  
田均則凡曰官曰民成賦惟一產絕糧存者可無也  
差酌貧富爲銀爲力勿拘銀力於富貧省費相反者

可無也若是庶幾哉其民有瘼乎

### 兵防志第八

唐於棣州置觀察處置使

長慶元年置至二年罷

置團練守捉使宋

置防禦亦嘗置團練未幾復為防禦軍之號建隆以來有

飛勇有靜邊熙寧以後有飛勇有奉化有靜邊有崇勝金

亦置防禦使元為濱棣路置安撫使

明洪武元年置樂安守禦千戶所

六年始改棣州為樂安州是年已置樂安守禦

州此則未詳或曰宣德元年平漢庶人改為武定守禦千

戶所直隸後軍都督府其設官正千戶三人副千戶七人

百戶十人鎮撫一人吏目一人司吏與吏各一人京操軍

四百四十四人春成二百人秋成團操舍餘六十八人軍

餘二百人屯軍餘二百一十人屯地七十頃六十三畝有

畸本州王副使屯一百戶計地八頃七十畝成官莊一百戶計地七頃

五十五畝有畸樂陵丁家務二百戶計地一十二頃五十二畝有

畸海豐清奇堂二百戶計地屯糧八百四十七石六斗有

畸贍軍地七十一頃五畝其地即與各地畝銀百六十有

畸

正德七年因流賊之變特置武定兵備道設山東按察司



僉事一人領之奉 勅曰勅山東按察司整飭武定等處  
兵備官近者各處地方災傷人民貧乏者多官司不能撫  
卹或至聚而爲盜不可不爲之備今命爾整飭武定等處  
兵備仍照先年兵部題奏事理在武定州住劄往來武濱  
并陽信商河海豐樂陵蒲臺濰化利津青城新城齊東陵  
縣濟陽德平臨邑章丘鄒平長山淄川各州縣并境內衛  
所屯營督同各該軍衛有司操練官軍舍餘民快人等演  
習武藝防捕盜賊保障地方該用馬匹器械賞勞等項聽  
爾設法整理爾湏申嚴號令禁約下人不許因而生事激

功害及良善凡一應事宜務須區畫詳明措置周密小則  
從便施行大則奏請定奪該管有司衛所官員如有貪殘  
不職玩寇殃民應提問者徑自提問應參奏者具奏處治  
爾爲憲臣受茲專任尤須持廉秉公殫心竭力修舉武備  
務期盜賊屏息地方安靖以副朝廷委用至意毋或因循  
怠忽自貽罪愆爾其慎之故勅道轄州二武定縣十六  
中陽信至鄒平等外長山巡檢司五曰清河鎮曰大沽河  
淄川今分屬青州兵備曰豐國鎮曰久  
山鎮曰所一即武定守馬步軍舍壯快統五千六百四人  
舊縣鎮所一禦千戶所  
前志曰夫武定道蓋兼古渤海平原樂安諸郡地而爲一  
成鎮者也東控海而扼濁河北撫天津南捍濟省東南聯

青州西南若北與臨清霸上相引望承平則弭盜寧民與  
 共共翰京師一或有警當必相與為聲援為犄角以保障  
 一路聯絡四方以共尊朝廷而殲寇孽皆于是乎  
 在茲設兵備本圖而臣子為天下國家十分義也

教場舊在東城之厓正德間僉事達遷置于此自為記記

曰武定舊立教場于東城外地僻而曠久則莫可守城中

東北有地廣平而藏密能容兵馬便操閱因改遷于此場

北臺基一臺上庭宇二臺下小旗鼓臺四東大旗臺一兩

旁小營臺五南大將臺一四旁小營臺四外有轅門一內

有屏蔽一東西方池二以備霖潦東又濬古井一以濟渴

飲西又增小舍一以戒止宿幅園種樹數千株以為界植



亦俟成長爲蔭息之地餘若法程金華旂幟類皆存之有  
司此不復載焉茲功完已久雖規制未備亦將有待于後  
也使無以紀其成併以今有者或失之由是附此刻以爲  
之攷云繼此歷有規恢廢轅門南去二十丈餘爲大門三

楹設屏蔽于門之外北臺亦漸築廣闊庭宇閑勝加舊十

之七矣

僉事賜常留詩于此曰碧油幢擁角弓鳴訓練貌  
貅百萬兵推轂自憐非將種登壇誰信是書生黃

雲塞遠湖沙靜白帝城高渭水清海  
北江南盡王土蓋將長劔吞昇平

嘉靖二十三年十一月僉事燁具議呈請減團操壯快其

議曰民壯之設倣古寓兵於農之意三時力田一時講武

民力不匱而兵威已立甚良法也柰此之弊不惟徒具虛  
文抑且重貽民害人心玩而不振敵愾有民財耗于無  
用腴削何堪若徒言治兵而忘所以息民譬鑿墉之址而  
益其高解不覆矣嘗謂民安而上下相親則外患之來民  
皆爲兵民窮而上下相睽內變之起兵且爲寇此尤宜深  
長思也竊照本道團操民壯武濱二州章丘等縣多寡不  
等共二千四百七十五名每名工食銀七兩二錢共銀一  
萬七千八百二十兩其私取多盈之數不與焉此一役耳  
費溢二萬貧民膏血寧有幾耶合無農時悉歸耕稼以九

月初一日赴操十二月十一日散操歲操凡一百日舊則  
每日工食銀二分請增爲二分五釐百日銀二兩五錢再  
增七錢爲器械之辦皆官徵臨操全給再徵銀一兩入庫  
上本道循環簿爲聽征銀兩每名共銀四兩二錢比舊減  
三兩歲共減銀七千四百二十五兩以少甦夫瘠瘠就盡  
之民一便也歲積銀二千四百七十五兩以實帑藏以備  
不時犒糈芟粟之需二便也歸二千五百人於農使服勤  
南畝以蕃執植三便也豈惟便民兼得練兵之法焉兵不  
可覲久覲則玩玩則氣散聚三千浮浪之夫于一州以是



爲講武矣。平居安享民食，以爲常。一或調之，未效絲縷之力，而遽嗷嗷以告。索此其弊，將坐受困踣，而實無濟於緩急之用也。况操練之時，旗纛金鼓，徒侈靡文，進止擊刺，殆同兒戲。不見寇敵，而日弄干戈，以爲事。無有乎歲月，無有乎張弛。如是而求其不玩不散，而有森肅之威，有是理哉。古云：覲武無烈，今日之弊，正坐此也。虎之躍也，必伏乃厲；其勢然也。欲張之，必或弛之；使野處不暱，養其撲愿之心，而後可以作其敢勇之氣。四便也。故無事而演武，一年之內，百日可精；有事而用兵，百里之間，一呼可集。此正伏至

險于大順藏不測于至精之微機也然兵必有領帥然後有統紀請二十五人擇有勇畧者領之倍其工食以優之爲六兩四錢出銀之戶二名朋一名仍徵銀二兩貯庫五十人擇勇畧之出衆者總之再增其工食以優之爲九兩六錢出銀之戶三名朋一名仍徵銀三兩貯庫百人則責諸巡捕官統之每季仲月朔巡捕官赴道一聽號令焉每月朔五人之總赴道一聽號令焉每月望二十五人之領更遞赴道一聽號令焉是雖散之田晦而氣脉聯絡麾召即至率然用之戰陣將領部落亦井井俱在矣若謂三

時罷操境內時有竊劫之盜何以禦之兵貴精不貴多輪  
操快手四百零五名令軍餘幾三百名狗鼠竊發無難驅  
殄但快手工食亦有可議者馬舊則每名銀十八兩而私  
取多或倍之上雖知之莫或禁之何哉彼藉口于工食之  
外買馬餵馬不酬其費故也陽儉其常數陰縱其倍取法  
守安在哉此貪猾得以肆志而貧民益不支也請明為劑  
量以定其數每名初年官徵買馬銀十二兩責令州縣正  
官驗買瞭壯好馬解道印烙以給騎操每年工食銀七兩  
二錢餵馬銀五兩八錢再增銀一兩五錢為器械



辦共十四兩五錢皆官徵按季旋給夫以二年總數計之  
先後伸縮之間不過共增銀五兩耳彼既不得藉口以多  
取又不得預支以浪費所買又皆臆壯之馬以革往時借  
賃老瘠遺饋之弊法無便于此焉再照有馬民壯武定州  
八十名濱州十五名海豐縣五名武定所軍餘二十名原  
領官馬即如近日義勇馬之例不惟餵養甚難且年久倒  
死買補領一家則破一家此尤武定州之偏累也合無賣  
銀貯庫不惟省平時之虛費抑且濟異日之實用矣至於  
無產應役之人一旦罷操失所賴藉恐或聚而爲非則責

今州縣查出凡守城民壯之役募此輩充之可也雖然操  
縱存乎人緩急因乎時後有更代隨時改革之宜又不可  
執一論矣職非不知因循易于便事但杞人之憂展轉彌  
切職事所關固有不容默者時巡撫都御史端公詳允俱  
依擬舉行民到于今便之

論曰君子不恃天下之無患而常恃吾之有備是故  
治世不敢忘兵也驅平白水震懾潢池非兵孰藉然  
兵能備患之將然而未必能弭患之幾於未然故善  
弭患之幾者以仁百姓爲心焉何則百姓安則樂其

生不安則輕其死輕其死患至矣今之爲兵者不顧  
百姓生全死亡之何如而日爲淵淵之鼓以備患是  
備患之具也而患之幾則常隱或者曰兵固可弛乎  
曰非也練習奚可少特充夫不畏患幾者耳苟畏患  
幾而常貽百姓安則患幾不生矣縱有外患民即兵  
也又况其素教乎識者甚勿曰兵吾職也民非所司  
祠祀志第九

文廟祀先師孔子漢以下爵號代異祭皆釋奠 明洪武  
以來尊以王爵禮樂視周上公配享諸賢亦以封爵爲差



今上以爵號若瀆去其彌文稱先師孔子配享諸賢皆以

其姓而稱子籩豆用八侑用六歲春秋仲月上丁日行釋

奠禮祭器嘉靖二十六年僉事燁初造銅登十劍二十有

一簋簋各有十七爵三十有八仍有舊爵一差并尊  
二其餘磁木  
器不在數列

啓聖祠歲春秋仲月先丁一日行釋菜禮加特牲酒三獻

忠節祠祀兵備僉事贈左副都御史許公達今復贈禮嘉

靖十年僉事賜立正堂三楹前有拜廳中為儀門外豎綽

楔扁許忠節公祠五大金字知濟南南府揚撫書儀門內東

有碑亭學憲四明陸欽撰文曰余聞之國治無勇功時平

鮮節義多危而後畧著多難而後忠顯斯特其槩云爾夫  
謀定於素之謂畧義成於性之謂忠故排難不括器之利  
也守死不貳天之制也君子有從容以制變無貪幸以成  
功有慷慨以就義無矯抑以完名時之理亂又非所預焉  
國家承平百餘年海內不知戰爭民不操兵士大夫從容  
諷議諱言伏節死義事迺正德間流賊煽禍畿甸海岱騷  
然州邑長吏望風奔竄忠節未令山東之樂今南菁城無  
完堞民無固志下令誓必死曰有弗令者戮以徇迺勤日  
夜浚濠增陴繕兵積粟拊循其民而守之賊至則設伏出

奇或親操矢石突城出戰每戰必勝斬獲無慮數百人於  
是賊相戒不敢犯樂陵城天子嘉其功擢山東僉事以  
兵鎮武定武定素凋敝公復飭備如樂陵時旁郡之民扶  
携而至者填於道無何賊衆犯利津公出兵擊走之再犯  
德平又擊走之於是賊又相戒不敢犯武定城武定置兵  
自公始至今頌兵畧者必曰許公許公云公擢江西副使  
值宸濠露反形亟白當道宜先發其罪有不如立意者輒拊  
膺頓足曰吾不知死所矣難果作宸濠以兵劫公公抗義  
不屈竟僞賊以死於乎烈丈夫之行也已蓋公少負奇類



以經畧世務為己任性易直忠亮許國其素志也故卒然  
常變應之有餘臨利害而不可奪豈平居無術遇事周章  
徒自斃以塞責者可倫哉公遇害之明年今上即位贈  
左副都御史謚曰忠節命有司建祠江西之南昌迺隸人  
思公若喪父母歲時伏臘為位哭奠祠未有立焉嘉靖己  
丑兵憲王公暘來備武定士民有為言者公曰國之大事  
維祀若戎戎飾而祀廢政迺弗咸盍祠之以言于都臺邵  
公錫則從以言于柱史熊公榮則從迺撤廢寺得隙地於  
學宮旁營之堂廡庖舍翼然煥然又得廢圃於演武塲墾

之入其種莠以供俎豆

此祭田也凡六十畝即有司歲祀東城之里廢教場地

罔斁是舉也上下嘉其成幽明孚其感忠勇作其氣風紀

植其綱豈直慰隸人之思哉祠既成余適以督學來東臬

兵憲公曰斯不繫風教耶子為記之意余筮仕聞忠節事

未嘗不悲憤涕下則又以不得見其人為恨往參江藩得

謁公於南昌祠迺今東來又謁公於武定祠貌像若生拜

瞻悽愴能無忠義之感乎然且聞江右人言曰宋有文丞

相明有許副使又聞山東人言曰唐有顏平原明有許樂

陵斯二言何謂哉蓋文山祠於吉安南昌去吉財一水後



二百餘年忠節祠建焉又一文山也平原祠於陵武定與  
陵相接壤後七百餘年忠節祠建焉又一平原也夫忠義  
之氣貫金石格天地而况其精神氣類之相感召死猶擇  
鄰曠世奚間其事同其心同宜其血食之地亦同可謂之  
偶然哉嗟乎開元天寶之亂河北二十四郡靡然摧喪平  
原一倡大義天下始知有勤王之師航海抗崖國事去矣  
惟一死以明君臣之義成敗又奚擇焉由是觀之忠節之  
功不獨在武定狼山之捷賊黨勦平微公孰為之毆其忠  
不獨在抗賊鄱陽之戰群公効力微公孰為之倡然平原



天子不知名而忠節已錄功於生時文山賈恨以沒而忠

節遂酬志於死地二公血食一方忠節且無祀焉忠節不

負臣子天下後世豈負吾忠節哉於乎可以為萬世報功

之勸矣僉事瑋諱忠節祠三詩○萬年如一日百代如一

原立高名垂太史烈義肅藩侯帝曰噫若是文山者同流

建祠繪像貌增秩超凡儔愧彼二心者凜然生氣浮徘徊

傷往事亂階誰之尤○惻惻豫章事言之實痛心侃侃許

公死千載樹德音齷齷衣冠輩與世為浮沉俛首執臣禮

甘心為所擒日月重昏霾乾坤忽濛陰偽賊口不屈白刃  
任其侵哀哀江民哭赫赫上帝臨寒雲鎖祠宇庭木但蕭  
森○公昔尹樂陵孤城抗勅敵血戰連三捷建茲偉哉績  
遷公鎮武定壘書自天錫轅門戟劔明虎旅號令的及公  
憲豫章慷慨忠烈激殺身成令名公傳尚歷歷我  
未備茲土瞻祠如面覲洒決向公前徒抱中心戚

名宦祠嘉靖十九年知州侃立歲春秋仲月祀先師畢舉  
祀舊祀唐棣州刺史曹華宋棣州防禦使何繼筠棣州教  
授陳師道今按晉樂陵太守邵續北魏樂陵內史蘇淑唐  
棣州刺史員半千後梁棣州判官張錫明武定知州崔  
重武定兵備僉事王璣王燁俱功德在人予祀典當收書  
之以茲

鄉賢祠知州侃立歲春秋仲月與名宦同舉祀舊惟祀左  
副都御史李濬今按晉太尉石鑒唐太子舍人任敬臣宋  
節度使張令鐸明監察御史成嚴戶部主事劉溥慶陽

知府馬歲亦俱祀典所當收者李公濬之立祠也命事璣  
記之曰李公永樂季年由上舍生拜監察御史高煦將有  
逞時適宅外艱幾闕且同處一城勢殊岌岌煦方鍛金革  
蓄硝黃逆端萌矣公聞之弗聞也已復募籍壯勇要糜操  
卒效孳種馬釋狴重辟逆蹤露矣公聞之弗聞也彼弗公  
疑矣顧將以帷幄心膂重毗是畀旋走逆使以禮致公乃  
姑辭以衰經緩以終制若不見彼圖之為非者於是益弗  
虞矣公乃請命母氏誓于家衆曰必先機發其變遂乃宵  
馳濟南徧白省臬假符守王舍託報于海洋比煦覺且追



之一使不悟再使無及而公抵京師矣爾乃入觀文華

面承顧問陳逆謀暴著之狀贊六飛親討之策財四日夜

師臨城北蓋迅雷不及掩耳而魄已先褫無何礮入而宮

棟摧逆煦遂成擒矣相傳聖駕日夕抵州駐驛八万泊

脊無南城門樓煦怖甚輒出北門就縛凱旋天子嘉其勞晉左僉都御史

或曰李公之事何如鼂錯曰未易言也處宗藩之變與他

寇異弗密則害成弗神速則彼得為謀非天子自將則彼

為辭錯也弗密有之景帝之弗自將其若之何於手章

皇帝天兵之神速李公濬之幾事之密漢君臣交有愧矣

又曰許忠節公死寧藩之難何如李公曰未易言也宸濠之勢蔓而鉅忠節方當仕有室於早圖然其心猶之公也易地當皆為之大抵臣子於國家不幸而違宗藩之難幾可先發則為李公伯淵之告變於是用力省而收功過天下陰受輯寧福善之善也徇且迫身則為許公汝登之死事於是忠義白而人紀植且以懾天下亂賊之心大節也勢已燎原人心洶洶則為王公伯安之舉義於是渠魁就檻黨與伏辜土宇幾裂而復完宗社幾搖而復奠大畧也三者君子無所與擇唯其遇而已君子之於三者無可軒

輕惟其是而已茲孔子所為並稱三仁者也

社稷壇在州城之西北洪武二年同知昱立中為壇壇崇

三尺闊丈餘不屋繚以周垣有楔門歲春秋仲月上戊日

祀

風雲雷雨山川壇在州城之東南規制初修並同社稷壇

祀次一日嘉靖二十六年夏大旱僉事燁嘗祈雨于此自為歌令小兒執柳聲之曰柳青青雲蒸蒸兒郎

額天天鑒誠五日不雨麥無登麥無登民無生願天垂憫靈雨零既而雨未沾足又為歌曰兒郎再歌歌聲哀非敢

瀆告民罹灾靈雨雖降猶飛埃黍稷無望民艱哉願施其澤濡九垓濡九垓阜民財忍令轉死入蒿萊

郡厲壇在州城之北成化十七年知州裕奉參議邢表檄



立中植壇墀構屋繚以周垣有楔門歲凡三祭春清明秋

七月望冬十月朔祭之日迎城隍神為主

裕又于壇後置漏澤園按漏澤

園自宋崇寧間詔立後代因之蓋凡死者魂氣飛颺于上

其魄寂土而守骸骨有園則得其歸則不為厲是

王者仁鬼之政也李國中鬼市雜陳其必男左女右以

瘞之庶風節不瀆于幽冥矣此蓋聞之訓導黃致用云

城隍廟在州治東南洪武二年同知昱立春秋仲月合祭

于山川壇月朔望晨有司詣廟參之弘治二年知州澄重

修翰林編修羅玘記記曰武定有城隍廟其神于章皇

帝之征漢也能著明靈以陰制其兇渠醜類如醉如寐以

待黃齋之至不遺一矢束手就俘肆今賈侯來知州事因

念神功在社稷不誣廟不修且壞乃自堂徂門以屬于最  
外門自左右榮分而垣之以合于堂浚之樓而止視昔則  
加之堂中貌神侍衛文武班于兩偏亦貌貌止于東西廡  
下善惡宜報耀愚嚇俗雖不皆合于古不欲奪其舊也廟  
成書此以紀歲月云十五年知州永禎嘗誤迎送神詞有  
序曰武定古樂安郡也鹵壤巨浸役賦浩繁而民篤于事  
神蓋其習俗然耳余至郡之明年辛酉旱蝗秋潦壞民居  
食朝廷遣使賑貸余亦懇禱于神民賴不徙明年夏秋  
禾麥繼登因感神惠期率吏老每歲以義祠神于春秋之



孟祈福吾民焉迺作迎送神詞使歌以侑饗其詞曰神昔  
邁兮九州眷茲土兮淹留際衆庶兮紛罪尤皇眷命兮翼  
大猷中值外難兮殲國讐聰明不爽兮與天為傳佑我民  
兮壽福且休幸新祀事兮春與秋神之來兮靈風颺英飛  
龍馭兮虬駝以兩吏民拜舞兮洋洋下靈祥兮彤嚮頽少  
歆兮苾苾慰我民兮傾仰祐迎神將去兮何之叩天闔兮  
陳民詞盡瘁穡事兮豐穰是祈螟蝗作梗兮歲且落饑皇  
弗遺民兮賑恤孔施天心助順兮變蓄為禮荷天之休兮  
民樂熙熙祈天兮福文和風兮甘雨蕩滌兮寒饑桑麻兮



稷黍神翩翩兮來歸千秋兮崇祀

神祐送

馬神廟在州治東北正德七年知州璽立春秋仲月剛日

祀

土地祠在州治儀門東月朔望晨有司以下參之

八蜡廟在州城南嘉靖四年知州一經立今廢

旗纛廟在千戶所內洪武元年立主祀軍牙六纛之神舊

典春祭用鷩鷩秋祭用霜降今惟霜降日一祭凡雜廟不在祀典者

弗書

論曰國家盛典在祀祀也者所以崇德報功也鬼神

功德愈久而恒新故人心之報歷世而不窮為壇為  
廟為祠凡建邦育民者無不於神致力以是也吾州  
秩祀先師而下十有一固恒典矣若夫鄉賢名宦則  
尚有當祀者焉蓋祀不可泛亦不可畧今考之史傳  
驗之民情其人於祭法無不合可畧而弗舉乎書曰  
咸秩無文無文且秩矧已文乎要之公理在人有不  
容渝非私意所能強置也秉禮君子當斟酌於此矣

武定州志上帙終

武定州志下帙

職官志第十

曹魏

太守

陳矯字季弼廣陵東陽人也  
太祖辟為樂陵太守

韓暨字公至太祖辟為丞  
相士曹遷樂陵太守

晉

太守

邵續字嗣祖安陽人為樂陵太  
守綏懷流散多歸附之





北魏

太守

李悌傑武定中以貪汙賜死

崔接放適自高不拘常檢

張敬伯以隨父歸國之功賜爵安昌侯出為樂陵太守

張纂字伯業中山人在郡多所受納間御史至棄郡逃走

侯文和滑稽少智辭說無端尤善淺俗委巷之語至可翫笑

房惠安

羅衡

盧洪

傅乾愛

王蓋海

趙揆

張敢之于此七人者咸于郡政無改

內史

蘇淑字伯和武邑人歷官樂陵內史在郡綏撫甚有民譽

中正

李淑虎性清直甚有公平之稱

北齊

太守

趙頴河南清人

房豹字仲幹清河人遷樂陵太守哀矜貧弱

高攸為樂陵太守其政尚嚴

隋

刺史

裴蘊文喜人大業初為棣州刺史明辨有吏幹

唐



團練使

田煥煥先為棣州刺史  
憲宗詔改團練使

刺史

崔樞在郡以秀才舉任  
欽臣

貞半千在郡不專任吏常以文雅粉澤故禮化大行有清白節

曹華宋州楚丘人在郡有捕盜功

張蟾龍紀元年為棣州刺史王師範攻棣州拔其城蟾不出死之

邵播天復三年為朱全忠所殺

王稷為觀察使李全畧所殺

司馬

李全忠

廣明中為棣州司馬有蘆生其室

韓儀

字羽光京兆萬年人宰相偓之兄為御史中丞忤朱全忠貶為棣州司馬

別駕

張達

與司馬李全忠同時任

後梁

刺史

華温琪

字德潤宋州下邑人徙新州以避河患民賴之

劉遂清

安丘人任郡有善政

劉君鐸唐為判官也然能辟張錫

判官

張錫在郡有政

錄事參軍

夏侯浦開平中以明經任

後唐

刺史

左皓皓十世孫必字長源亦至棣州刺史

後晉



刺史

李瓊 滄州饒安人

翟光鄴 字化基 濮州鄆城人

段希堯 河內人在郡兼蓋

王健 未詳何許人

後周

團練使

王仁鎬 邢州龍岡人

杜漢徽 京兆長安人

宋

防禦使

何繼筠

字化龍河南人史臣稱其領  
致克捷

石保興

字光裔開封浚儀  
人石守信子也

成閔

字居仁高宗朝進  
士為隸州防禦使

知州

魏羽

字垂天歙州婺源人

賈同

字希得青州臨淄人

張洞

字仲通開封祥符人

孫冲字升伯趙州平棘人

王陟潞州上黨人

崔立字本之開封鄆陵人

向綜字君章

王涉坐肩官地為職田

教授

趙挺之密州諸城人

陳師道字無已魏後山元符三年除棣州教授

張之才有詠廣野軒詩



巡檢

張思鈞

邢州沙河人端拱初知齊州本以武進素不知民政僅踰月徙棣州巡檢

金

防禦使

劉仲誨字子忠宛平人

趙之傑字伯英真定人

蕭恭字敬之奚烈王之後也

張汝霖字仲澤遼陽渤海人

李愈字景韜絳之正平人

完顏霆 中都寶坻人

斜卯重興 為裨將張聚所殺

徒單繹 在郡以政聞

同知防禦使事

楊野大定中奉詔修棣州城

刺史

趙陔 字德固 遼陽人

知州

郭安民

石玠二人相繼修葺學宮

提控

乞石烈醜漢興定初有擒張聚功

教授

王樞

田曦明昌間石玠修學二人俱有規畫功

元

安撫使

韓世安中統初有破李全功後坐罪誅



勸農使

陳邃

中統二年世祖初立勸農司以邃充使

達魯花赤

董阿末簾 不聞其政

耶律天祐 世祖朝任

州尹

擅禮 字信之東平人以病去

石乞兒名安仁 北京順中故家

韓世範 厭次人

安伽烈斛益都人

石抹飛熊大同人

燕京奴大都人

李天祿廣平人

崔毅字仁夫濱州人

韓昇荊州人

郭浩字善甫大都人轉

謝居明字顯卿真定人轉

朱國用以字漢卿河內人

武定府志

卷三

職官

武定府志

安乃滿又益都人

曹征字周州濟寧人

李讓字伯溫晉寧人

王仲字伯讓聊城人

溫澤字潤之大同雲內人

謝仲楨字大榮晉州人

晁顯字顯卿鄆城人轉

張毅字弘道順德人

程仲昶字子陽汴梁人



程良佑字裕卿廣平人

梁宜字彥中在平人

王元字善長太原人

雷好義字叔敬順德人

穆仲信字真卿冀州人

王雲字從龍東平人

張士瞻字伯嵩章丘人由戶部

王茂材字可表蠡州人

同知

梁行篤

提控案牘

李惟弘

知事

陳頊無政可聞以上三人俱

判官

王士元字堯佐恩州人

教授

朱持正當時稱朱李文

明

知州

范文聰 應天人 監生

馮文秀 文水人 舉人

章珉 蘇州人 監生 在

孟寬 巡安人 舉人 以

王頂 開封人 監生

蕭珍 襄陽人 舉人

趙琳 大同人 監生 以



尤實

成都人舉人

汪清

揚州人進士以

沈肅

字用欵山陰人舉人嘗出

計昌

字汝賢浮梁人進士謂其嚴

鄭華

濠州人舉人

魏述

蒲州人舉人在郡有政後以才調

謝宗

紹興人舉人

鄭柰

武進人進士

王諫

衡陽人舉人其政公勤

廉慎遷知南安府

孫裕崑山人舉人

王樞太和人進士以

賈澄辰州衛軍生進士在郡

王勳應天人舉人

汪標祁門人進士

趙永禎字終吉成都護衛軍生舉進士居職動必由

劉枚永平人舉人以

朱諫樂清人進士

崔璽字廷用通州人進士在

即有禦賊功後致政歸

三

陳清蕪湖人舉人

王濟丹徒人舉人

張僑岐山人舉人以賄敗

姚遜長鳳翔人舉人酷刑嗜賄卒為兵備

解一經交城人舉人

劉純州人舉人

邊爾任立人官生

唐侃字廷直臨默菴丹徒人舉人在部以清最聞遷

許寰丹徒人舉人



朱選 道州人舉人致政歸

劉佃 見任字仲有號吾南安福人進士丁未歲監修州志東于衆曰竊聞之紀實存乎志與故存乎

人武定古名邦也而州志莫傳識者憫焉顧余非陋濫守茲土竊不自揆欲新其典第一方之

故實無窮一已之聞見有限非集衆聞廣群議未足以圖成也顧諸君生長茲郡或流於故老

之傳或得諸日擊之餘或出自家藏之緒倘可片聞毋惜惠示則諸君共成之業亦守土者之

幸也顯此于懇統祈鑒納

同知

夏昱 未詳何許人洪武初為棣州同知是時天下初定一郡規制皆其裁定士論賢之

楊銘

張尚文

王綱

徐傑

馬勇

陶塘

徐璫

李遠

游元欽  
吏員

陳望

黃金貴 以上俱逸其籍里

羅珪 壽州人 監生

趙昂 蒲州人 監生 言語煩瑣

張士貴 合肥人 監生 自以為能文詞

劉憲 施州人 監生 以南京戶部主事請系漆註

戴熠 房縣人 監生

施鐸 竹溪人 監生

尤中規 龜源人 監生

段經 見任字天常 號古園 涇陽人 吏員



判官

盧敏 菑源人

賀祥 永平人

王教 博野人

曾政 江寧人

麻芝

景玉

羅卿 各傳說其政事俱由監生  
山七人者賢于職州入至今

石珉

馬忱

劉文

樊琦

張羲

齊經

魏應時

李溥

王明

吳景

周坦

孫迺齡貪而且酷號為孫飛虎

劉鳳山以上俱逸其籍里

于惠歙縣人

朱鐸潁州人

余鑰遂安人

郝經汾州人

杜淮太原人

張鳳者羽裕州人



劉文瑞浮梁人

周涇靜海人

凌岐潁州人

李綬武鄉人  
以上俱監生

汪伊婺源人  
進士  
以大理寺副請

詹汴見任字濬之  
孫秋園

劉廷輔見任字以  
德號石峯

吏目

丁傑海州人

任傑 文喜人承差

宋淵 青豈人監生性閑適  
年未四十乞解職歸

魏倣

周仁

李雲

杜澤

喬世臣

丁相

郭正

高嵐

王一直

王天澤

程萬

劉楷俱監生籍里逸

劉垠字天弘監生東園

學正

陸傳上虞人舉人

鍾鼎大興人



丁軫 太倉衛軍生舉人

郭承 太和人舉人

陳叔疇 莆田人舉人

鄭縉 新淦人舉人

姚善 灤州人

陳素 靈寶人

胡景 未詳何許人

石璣 嘉興人進士

岳璠 莆田人舉人

蘇民望 博羅人舉人

程棫 陽曲人舉人

王勳 江都人監生

何文俸 候官人舉人

羅乾 廬陵人舉人

何宙 字孟弘 號琴溪 監生 浙新昌人 重修學校 新纂

如金山則舉其婚事如石良才則周其窮乏 舊學側井水鹵一朝變而甘之有鵲聯巢于尊經

閣上人以為學修而瑞應至有如此所著有琴溪編姚狀元涑韓狀元應龍已序引梓傳

訓導

郭大經 恒曲人監生潔掃學宮內外潔靜如有傾毀

湯淵 邳州人

夏禮 都陽人

石旻 元城人舉人君子謂淵之剛介禮之博雅旻之

程剛 候官人

信立 當塗人

尹時 永平人

周銘 昌黎人

謝表 定興人



朱瑁河內人

謝顥會稽人

傅大紳景州人

張紳全椒人

石聰麟遊人

劉守寧長興人

楊廷佐邠州人

范廷璋徐州人

楊玉滌州人

李仲寶蔚州人舉人

石恒臨淮人

齊冕高陽人

高進清苑人

滕節江浦人

蔡楨大興人

葉愚青田人

俞玠諸稽人

汪著婺源人

蘭世振趙城人

楊九功孟在縣人字惟叙號澳東

黃致用在任字施道號柳溪

兵備僉事正德七年始設

許逵固始人以下俱進士

王汝舟華陽人

韓明會稽人

王舜漁常熟人

李崧祥貴池人

謝旻任縣人

王暘武功中衛軍生

王幾西安人丁未修州志未就

王琇宣武衛軍生

饒思聰新淦人

程鏡洛陽人

王燁字韜孟號檉菴金壇人丁未命修州志

官書有詳畧者何傳曰所見異辭所聞異辭也

論曰武定曹魏以來置官凡十七其間損益隨時職



任異分名固煩矣至於置官之意則欲其殫心慎事  
共爲斯民未嘗不一也得其意之一則乘承相應勢  
固相維名何嫌於煩否則心有異同則政有惠虐才  
有彼此則績有巨微循其名率見其實此所以備而  
書之昭鑒戒也雖然官之能否廉穢難齊治亂由茲  
以判官多不治則名爲虛文簡而能治則名爲實用  
名實之際可無慎與若夫今日之弊惟患冗員未去  
耳

選舉志第十一

漢

賢良方正

東方朔

漢書朔平原厭次人  
舊志收之

唐

孝廉

任敬臣

舊志云敬臣事父母至孝每食必具酒肉無  
遺色有餘力則潛心于經史鄉黨稱為任孝  
子唐書  
有傳

宋

舉人

劉擴崇寧初舉

全

進士

朱自牧

字好謙進士及第任葭州通判所著有中州詩集傳于世

苑時可

字子進任太常少卿

李果

字子材

王廷烈

字盡忠

郭衡

字平甫任永河令

姚建榮

字興祖任太常博士

萬昂字新甫

范鐸字振文任監察御史

張拱辰字德茂任翰林直學士

竇宇字器之任戶部主事

杜舉字雄飛明經科

徐松齡

許濬字景山

張顯祖字明文

王天與字國寶



楊鐸字宣文

范元字炳文

李師玉字温然

李備字賢佐

舉人

張銘祖嘗書仲山修城記

元

進士

普顏帖木兒

字希古狀元及第累遷至山東宣慰使兼樞密院同知

劉復亨

字遂初寧路總管

授翰林院修撰累遷至諫議大夫普

舉人

劉謙

字自牧乙酉省元為刑部尚書五十一歲六十于官追封濟南郡

侯謚文肅

于紹德

任陵州學正嘗撰隸州題名記

明

進士

汪淵

任兵科給事中遷湖廣按察司副使

賈真

任廣東道監察御史以上二人俱永樂甲申科

劉浦

字大濟坊書錦坊

順丁丑科任南京戶部主事有進

蕭凱

字虞佐進士坊

登天順庚辰科仕至四川按察司僉事

康紹宗

登成化辛丑科

仕至河南布政司叅議有進

揚學禮

字立夫號東峯仕至陝西布政司叅政

### 舉人

尹禮 洪武己卯科任山西朔州判官

汪淵

賈真 以上二人俱未樂壬午科俱登進士

李冲 山西忻州學正

郭蘊未仕

李延 山西同縣教諭

陳晉 河南丘縣教諭

齊良 山西榮河縣訓導

劉耽 陝西三元縣知縣

劉皎 唐縣縣丞以上七人俱戊子科

崔幹 南皮縣訓導

閔岑 井陘縣訓導

李鏞 未仕



孫璿仕至兵部主事

王鳳未仕

侯璲韓城知縣以上六人俱甲午科

劉英

艾茂以上二人俱丁酉科俱未仕

趙馥東鹿縣訓導庚子科

蔡雲密雲主簿有登雲坊

董寅石州吏目有步月坊

石宇未仕有應奎坊

郭智未任有折桂坊

劉政未任有步瀛坊以上五人俱癸卯科

李祭仕至刑部員外有攀蟾坊

劉綸泰州知州有奪錦坊以上二人俱正統戊午科

陳安歷任良鄉平山滑縣知縣有京闈坊

賈琦趙城教諭有文奐坊以上二人俱庚午科

設衡禮經魁初受永平府訓導遷德府伴讀轉審

劉溥有觀光坊

蕭凱有凌雲坊溥凱俱第進士

馬昂 未仕有觀光坊以上四人俱景泰癸酉科

胡源 遼州知州有思榮坊

閻肅 未仕有奎煥坊以上二人俱丙子科

馬歲 天順壬午科任黃州府通判歷陞太原府同知

楊芳 慶陽府知府有登科坊五馬坊  
成化乙酉科任趙城教諭有光榮坊

陳靜 戊子科任解州學正有擢秀坊

劉洙 春秋魁有麟經第一坊任遵化知縣

逯讓 高陽知縣有攀龍坊

於清 沁水知縣有一躍龍門坊

康紹宗 第進士以上四人俱丁酉科

郭吳 任山西清源知縣陞保寧府通判

殷峻 未仕衡之子有世科坊以上二人俱庚子科

蕭雄 癸卯科未仕

康紹儒 知臨汾縣紹宗之兄有聯輝坊

胡豫 遂平知縣源之姪有繼科坊

殷琬 臨汾知縣改肥香知縣衡之子有繼美坊以上三人俱丙午科

夏振 正德丁卯科任東廡教諭

劉仲禮 元城知縣有青雲坊



鄭坤汲縣教諭以上諭歷陞國子監學正保定府通判有登

劉楹癸酉科任太康知縣濬之子有紹芳坊

袁繼嘉靖乙酉科禮經魁有經魁坊受博野教諭陞

劉銳戊子科任邳縣知縣

劉繼先辛卯科

崔士偉庚子科

### 歲貢

李賈初任司務陞杭州府知府

成嚴任監察御史

馬昇中軍都督府都事

張毓兵科給事中

焦剛鴻臚寺鳴贊

張凱紹興府知事

都昶餘姚知縣

劉敬奇嵐判官

宗禮永清縣丞

劉進未仕

李翔衛經歷以上俱洪武間貢

陶鎔新安知縣

李濬仕至都察院左副都御史

范溥都司經歷

劉坦未仕

王韶寧國知縣

滕瓚孟津知縣

張瑄泗州同知

陳英未仕

韓煥天長知縣

全諄蒲城知縣

宋訥滄州判官以塞河有功擢知州事

崔倫高郵知州

呂勛祁縣知縣

王恕望江主簿

趙斌汾州吏目

楊智迨安府推官以上俱未樂間貢

李忠武邑訓導洪熙年貢

陳良仕至薊州知州



賈節 布政司都事

周隆 鴻臚寺序班

李治 南康府照磨

胡恕 蘭陽知縣

張善 宣城知縣

劉清 未仕

王濱 順德府照磨

賈宗 江都主簿

王榮 深澤知縣

田甫 未仕 以上俱宣德間貢

李誠 三河衛經歷

李舜 未仕

楚坦 海州吏目

趙茂 襄陽府通判

李本 泗州同知

劉貫 京縣丞

滕祿 歸德州訓導

趙祥 大寧知縣

賈銓 河陰知縣

崔勤 清水知縣

韓政 深澤教諭

曹海 武安訓導以上正統間貢

蕭珍 醴泉訓導

王恕 曲陽訓導

顏興 迓津訓導

李芳 西陸教諭以上俱景泰間貢

劉臣 隆慶州吏目

劉能 汶縣丞

崔傲 西安丞

楊志 未仕

李榮 衢州府推官

李文 秦安知縣以上俱天順間貢

李煒 登封丞

張懋 東安知縣

張奎 博野丞

石震



孫楨俱未仕

孫輔洪洞丞

趙琮燕山衛經歷

郭珍輝縣丞

趙懋兵馬指揮

王規丹陽主簿

宋傑息縣訓導

張麟廣西上恩州吏目

邵春成安訓導

孫胤馬邑訓導

韓章沁水訓導陞晉府教授

張讓偃師訓導陞鞏昌王府教授以上俱成化間貢  
王珍辰州府知事

李桀廩城訓導陞未壽教諭

陳會成安訓導陞孝義教諭

谷珣代府典儀

李焯韓城縣丞

孫玉鄭府教授

劉祥太平訓導

宋永沔池縣丞

董瑞涓川主簿

袁琮樂城訓導陞沂陽教諭

李熒潞城主簿

孫禮績溪縣丞

梁志學判府典儀

武忠未仕

劉義洪縣訓導陞汝源王府教授

李枝泰寧訓導以上俱弘治間貢

趙繼宗溧陽縣丞

韓宣濟源訓導

劉夔沙河知縣

劉魏樂州同知

楊祖道五河教諭

郭輝徐州訓導陞西平教諭

陳謙大同玉林衛訓導

劉梁常州府檢校



邢瑄太康丞州志賴其傳說得不滅人以為功今志

李鏞兵馬指揮歷陞右軍都督府經歷鄭府長史

賈軒未仕

傅珉莘亭縣丞

郭崇道未仕以上俱正德間貢

尹釗靜海主簿

江清屯留訓導

張杲浙川訓導陞清縣教諭

高桂臨汾主簿

胡璟 雄縣丞

李梅 宛平縣丞

趙鈺 南京通政司經歷 陞嘉興府通判

曾信 三萬衛訓導

王祺 易州訓導 陞五臺教諭

袁綸 未仕

耿祿 鴻臚寺序班

胡惟仁

郭崇德 遼東前屯衛訓導 改休寧訓導

謝達 懷慶府通判

傅璉 夏邑訓導 陞江夏王府教授

李泮 清封訓導

馬陞 四川寧番衛教授

李思祖

史勤學 合州訓導

韓希古 棗強訓導

李大章 汲縣訓導

李思宗 分水訓導

馬鉞

馬志仁

李坦

宋儒

援例入監

李崇 寧州吏目

李炯

杲琳 俱未仕

馬澮 樂亭知縣



胡貢 隰州判官

司浩 淮安府照磨

李承宣 綏德州同知

於俊 常州府照磨

王綱 嘉興府檢校

閔繼祖 序班 陞桐縣丞

辛勉 建寧府檢校

朱嘉謨 南安府照磨

劉顯 林縣主簿

曾良邳州吏目

閔珪授縣主簿

劉金

陳紱

傅朝佑俱未任

吳架隨州吏目

梁繼宗晉寧州同知

吳軻未仕

陳繼文

王之藩未仕

李津

劉錫

鞏禹卿

黃魁

袁思信

張曉未仕

傅朝泰

謝選

謝士冕

閆應元

閆應奎

謝士毅

人材

邢懋 洪武中由布衣徵為刑部尚書

善書

李僊 嘉靖二十六年舉今入直武英殿辦中書事

武舉



胡裕 正德九年舉

胡彭年 嘉靖十七年舉 裕之子

論曰古之選士者其才德行誼比且論定於平日而以時升之故其時獨稱濟濟焉降是則科舉之法興矣蓋時有不同各因一代之宜以盡一時之才耳自宋以來科目益盛吾州與選者代不乏人其間雖遭遇異齊事業異致然其名迹為一世之榮相埒後先也至我明三試法乎前代文字兼古經義詞賦律詩之體而上之是以洪武以後科貢彬彬登庸亮采各

著聲能風氣淪洽之所成學術教化之所積亦於是  
乎徵矣然科貢先後明時尚也紀載繁簡原淑慝也  
方今三途并用故爾合為一選舉若夫徵辟則又其  
表著振竒者矣望重當時聲隆後世固有出乎科目  
之外而可與科目並行也雖然科目今定制也他則  
皆緩而吾州反希闊焉豈如所謂氣數之說與國彥  
鄉英亦曰奮起焉爾矣

附屬縣志畧

武定之屬其縣四焉陽信焉商河焉海豐焉樂陵

陽信距州北四十里漢縣也曹魏時屬樂陵郡

時武定為樂陵郡

隋廢樂陵郡為棣州即治陽信唐為均縣宋為下縣元為中縣間雖分隸于滄德自貞觀後乃屬于棣無改焉今棣為武定屬如故

縣域袤五十里廣九十里

轄鄉六美化孝義欽風長壽歸德政德編里七十

縣署在城中惟西

學宮在縣治南

城惟土元平章俞寶翔周六里十三步崇二仞有四尺基

廣視崇不及三尺門四扁曰未和長阜迎薰拱極  
古蹟

瑗城縣東北五里

陽信古城縣西南七里

千乘城在縣北

博昌城在縣西

馬嶺城縣東十里

黃巾寨縣東南二十五里

藺相如墓縣東南二十五里



狼丘冢縣東南十八里此蓋春秋狩于郎之地後人訛爲  
狼遂起薛仁貴狼展野火而死爲冢之說誣妄甚矣  
甘泉縣東一里

鄉賢

宋李敦頤熙寧間人

金蒲察琦

商河距州西南九十里隋縣乃舊勃溼泆地也唐宋金元  
俱爲中縣亦嘗隸滄德自貞觀後屬于棣至今如故焉  
縣城袤一百里廣八十里

轄鄉五聚仙歸德順德隆德太平編里六十八

縣署在城惟北

學宮在縣治東

城惟土唐武中築周三里崇三仞有四尺基廣尋有半門

四各有樓扁曰明暉承恩鎮遠拱辰

正德八年知縣陳啟築護城

川

商河縣南三里漢許商所鑿因名隋又以為縣名

黑水潭縣東四十里

古蹟

張千戶臺在縣北歸德鄉

董公墓縣南十里

雙冢縣東北三十里

名宦

宋高若訥仁宗朝知縣事

元高禧除妖虎之患

樊好禮人立去思碑

薦舉

明田貞以賢良方正舉

程惟遠以經明行修舉

海豐距州東北六十里舊爲無棣縣隋開皇六年與棣州同置卽屬棣州唐貞觀中隸滄州太和初復屬棣州尋隸滄州宋元如之明洪武六年改爲海豐屬武定其縣唐爲上縣宋爲望縣元爲下縣云

縣域袤一百八十里廣三十五里

轄鄉四東慶雲西慶雲欽賢海豐編里四十三縣署在城惟西

學宮在縣治東



城惟主元至正丁酉俞削寶築周三里十有九步崇三仞有四尺基廣四里有五尺門四

山

馬谷山縣北八十里一名大山

騮山縣北一百二十里一名小山

川

無棣溝縣西北十五里

黃龍灣縣北七十里

古蹟

無棣城縣北二十里

廣武城縣北八十里

龍且城縣北二十里

信城縣北十里

浮囊口在縣西

秦臺縣東北五十里

自然泉在騶山旁一名古井

鄉賢

五代李惠唐莊宗時人

宋張凝真宗時人

李之純真宗時人

李之儀之純從弟

樂陵距州西北九十里漢縣也曹魏于縣置樂陵郡樂陵郡武

定開治唐武德中又于縣置棣州尋廢乃以其縣隸滄州

歷宋金元俱同明洪武元年始改屬棣州今州為武定

屬如故其縣在唐為上縣宋為繁縣元為中縣云

縣域袤一百里廣八十里

轄鄉五大安重合千童高南津順美編里五十六

縣署在城中惟西

學宮在縣治西北

城惟土周四里崇五仞其廣尋有七尺門四正德二年知縣許達塞其西止存三嘉靖十六年仍修復舊

古蹟

舊樂陵縣西南五十里

舊縣鎮縣西北三十里

張左丞墓縣西四十里

劉惣晉墓縣西南四十里



鄭尚書墓縣東南二十里

琉璃井在縣治南五十步

昌源井在縣治廳事後

鄉賢

漢成翊世順帝時人

北魏高允與崔浩同修國史卒謚曰文

五代李重進周恭帝時人

論曰志志州也何以附四縣夫縣屬州也不以附之  
非全志非全志則非所以全州也志附縣以全州擬

州志可也而何以畧夫縣自各有志也擬州之詳焉  
則被將贅乎我將贅乎蓋嘗論其勢矣先王制郡縣  
以相統屬離合權勢之妙也合而不離其勢難離而  
不合其勢散離中有合合中有離此郡縣之所以相  
統屬也故志亦然外四縣而弗書則太離盡其事而  
詳書則太合太離嫌於無統太合嫌於侵并是故不  
可不書書不可不畧

武定州志下帙終

# 武定州志叙

誌者記也記一州古今之事蹟也夫州之有志猶國之有史家之有乘史以記國之事蹟乘以記家之事蹟而州豈可無志以記其事蹟乎且武定爲東魯之名邦人材之淵藪尤不可無志者也州守吾南有感於斯與予議之于思昔日丘憲樗菴公修學功成之日興言及此後以奏績未遑今公舉行誠一州之盛事豈敢不盡心遂請二鄉進士敬虛劉公溪南崔公修之館於學宮之尊經閣越教月告成梓行吾南公叙之於首但以既有



叙終不可以無言予忝署學教事頗有考正微勞雖不能文短書以終卷耳且志書之纂原無所據其於事蹟之載於經傳者無不考究而記之矣經傳所不載而得於傳聞之有據者亦記之也參互考訂斐然成章則州人之論沿革論方域者可考於斯論山川論城池者可考於斯論公署論學校者可考於斯論賦役論兵防者可考於斯論祠祀論職官者可考於斯論選舉論屬縣者可考於斯噫武定自建郡以來歷千百餘年其事蹟所載不可得詳則今日之展卷披圖燦然亦可觀也豈



復如昔日之無所見哉則吾南公之校修琴溪子之老  
正敬虛公溪南公之同修其功豈小補哉其於民風土  
俗物產之類偶因所見之不同姑缺之以俟後之君子  
重修以識之耳

署武定州學正事新昌何宙謹書

武定州志下帖終